

宋代詔令全集

學術顧問

曾棗莊

劉琳

主編

王智勇

王蓉貴

第六冊



四川大學出版社

本書出版得到國家古籍整理出版專項經費資助
國家「一一一」工程重點學科建設項目
四川省哲學社會科學「十五」研究項目

宋代詔令全集

主編 王智勇 王蓉貴

▲
第六冊
▼



四川大學出版社

宋代詔令全集卷二二八

官吏拜罷

路官 三

朝請郎權發遣宣州周之純可廣東提刑朝奉郎新
差福建運副張修可知宣州朝請郎權江西運判
王祖道可福建運判朝請郎淮南西路提刑蘇解
可江南東路轉運副使朝請大夫江東轉運副使
李莘可江南西路轉運副使制

商度金穀之盈虛，詳按獄岸之中失，使者之任，朝廷慎選，蓋所謂將王命而明邦國若否者矣。爾等咸以幹力，屢更繁使，付之百城之富，一道之寄，或以初試銳精來效，或以易地習慣成事。悉堅乃心，廣集善譽。惟修擢自省郎，出總甌越，疾病自上，黽勉勿任。假其左符，足資卧治。江南諸郡，宣城爲大，敬服休命，知其厚恩。《彭城集》卷一九。

朝散郎虞策可荆湖西路轉運判官制

荆及衡陽，洞庭之阻，漕事之輸京師，其行永久。列郡之富，百吏之治，遐遠幽隔，又當周察，使者之任，其重矣哉！以某幹力著聞，前在蜀道，職業未究，今復付以八州之寄。宣布

恩令，思稱任遇。《彭城集》卷二二。

朝奉郎江東運判劉極可淮南轉運判官制

將漕之重，號爲外計。澄察百吏，則上之耳目；均節九賦，則國之淵藪。然用吏之術，久次則其效乃顯。爾前在江介，即有成績，今復付之淮甸，益觀遠略。祇服休寵，毋怠初志。《彭城集》卷二二。

新利州路運判溫益可湖南轉運判官制

湖湘之阻，遠於京師，所以惻恤民隱，宣布上恩，惟使者爲能副本朝之意。前以某爲巴蜀，今徙之南州。體予推擇之慎，宜有恪居之效。《彭城集》卷二二。

朝奉大夫新權知撫州鄒軻可江南東路轉運判官制

將王命之出內，明邦國之若否，使者之寄，爲朝耳目。誠得其人，列城受賜。以某歷試民事，舉集時譽。今賦稅之出，江南爲重，所以使百吏畏法，四民就業，將漕有序，歲計充牣。選擇用汝，宜勉之哉。毋墮職業，以孤任遇。《彭城集》卷二二。

金部郎中范錡可京東轉運副使京東轉運副使侯

利建可金部郎中制 元祐三年三月十八日乙丑(一)

朝廷經費調度，金穀爲重，內則文昌地官之屬，外則漕臺使者之任，非其深思敏智，不足以當吾慎選。以某久更吏職，綽著能譽。惟此司存，雖有中外之別，至其職業，非復劇易之判。易地而處，陳力就列。益圖善最，以副民望。《彭城集》卷一九。

河北運副唐義問可河東運副兵部郎中程博文可

河北提刑制 元祐三年四月二日戊寅(二)

瀕河之壤，晉魏爲大，使者之任，耳目攸繫。九賦所充，於以給邦用；五刑所蔽，在乎折民情。故將漕之寄，察獄之官，朝所慎選，人匪輕授。以義問屢宣使指，居積民譽；以博文內佐浩穰，夙効材敏。是宜并假四封之傳，往治百城之富。足食足兵，下無愁歎，庶獄庶慎，法如畫一，乃爲稱職。汝敬之哉！《彭城集》卷一九。

李周陝西運使告詞 元祐三年五月八日癸丑(三)

敕具官某：關中之民，勞於征伐而弊於饑饉久矣。朕既爲之含垢以和諸戎，天維顯思，助我豐歲。粒米狼戾，法當斂藏。繼出中都之泉，以廣窮邊之積。猶恐吏不時具，而民或未寧。分吾此憂，責在漕吏。爾忠厚之性，見紀於時；治辦之才，屢試以事。往推朕旨，去蠹賊之害，而督備禦之宜。使疆場永安，而民以無事。可。《樂城集》卷二八。

朝奉郎石廣京東路提刑制

朕於用刑，寧失有罪，而歲報大辟，有加無損。意法網尚密，使民難避易犯與？抑吏之不良，猶有遷情以就法者與？故於臨遣使臣，尤欲使知朕意。以爾質厚而識明，宜能導民以遠罪，哀矜而折獄。齊魯之俗，易與爲善。往祇朕訓，其盡爾心。《曲阜集》卷三。

彭次雲權發遣成都府路計度轉運副使楊國寶權

發遣陝西運判制

敕某等：何以聚人曰財，故國計莫敢或緩，苟惟後義先利，則民命或有不堪。惟能均節不失其中，然後公私各得其所。俾克厥任，每難其人。爾等惇實不苛，彊敏有濟，更踐中外，令問惟休。惟成都財用之饒，惟陝右兵食之聚，使典漕事，咸曰汝宜。調視盈虛，懲察貪暴，時乃汝職，往單厥心。可。《永樂大典》卷一三五〇七。

路昌衡謝麟除官詔 元祐四年七月丙申

朝散郎路昌衡依舊江淮荆浙等路發運使，其新除直秘閣、知

(一) 年月日據《續資治通鑑長編》卷四〇九補。
(二) 年月日據《續資治通鑑長編》卷四〇九補。
(三) 年月日據《續資治通鑑長編》卷四一〇補。按蘇轍時已任戶部侍郎，此制是否其所草，當考。

潭州告繳納。朝議大夫、新除直龍圖閣、知廣州謝麟再任知潭州。《續資治通鑑長編》卷四三〇。

罷呂溫卿江淮荆浙制置發運使詔

元符元年九月丙寅

呂溫卿發運使，於淮南州軍聽候朝旨，仍就近供答文字，如有罪，不以將來赦原。《續資治通鑑長編》卷五〇二。

權發遣河北路轉運副使王博聞可轉一官升充轉

運使制

敕具官某：惟爾材力之優，奉使朔部，供億新壘，役不愆期。考諸事功，又加辦集。將命若此，朕心所嘉，宜正使名，仍遷位秩，併推恩典，以示眷懷。往其欽承，無替爾守。可。《摘文堂集》卷四。

朝散郎河北轉運副使康位可集賢殿修撰河北轉

運使制

敕具官某：河北被邊帶河，將漕於茲，任屬攸重。惟爾自膺臨遣，勤恪不渝，職業交修，達於朕聽。宜加寵命，擢進使名，仍升書殿之華，益峻外臺之寄。往思所稱，尚觀爾能。可。《摘文堂集》卷四。

左朝議大夫提舉西京崇福宮宋喬年可依前京畿

轉運使制

敕具官某：京畿將漕之臣，權任視他路爲重，朕於用人，

考擇攸慎。以爾性資純明，年力強濟，曩膺臨遣，風望甚優，宜解琳宮，俾還舊服。體茲申命，無替前勞。可。《摘文堂集》卷四。

熙河蘭湟路計度轉運使降授朝請郎充集賢殿修

撰洪中孚可顯謨閣待制本路都轉運使制

敕：西清次對，資望高華，選惟賢能，夫豈輕授！具官某夙以材術，揚歷外臺，敏於赴功，往克稱職。比因奏計，灼見恪勤，蔽自朕心，擢參從橐，仍遷都漕，俾峻使權。其體眷知，愈加懋勉。可。《摘文堂集》卷四。

戶部員外郎吳擇仁可發運使制

敕具官某：發運置使，會東轉輸，以助經費，其任可謂重矣。惟爾出按邊郡，入踐民曹，宜知邦國調度之詳，是用選於在廷，擢總六路。爾其夙夜究心，圖以效實，稱予寵命，尚加勉哉。可。《摘文堂集》卷四。

刑部侍郎曹孝綸可顯謨閣待制發運使制

敕具官某：夙膺選掄，寢更要劇，貳予憲部，亦既閱時。惟六部轉輸，爾嘗總領，其申命書，寵以使權，次對西清，時惟舊職。往圖效實，尚肩乃心。可。《摘文堂集》卷四。

(二) 甚優：原爲闕文，據四庫本補。

朝散郎淮南運副張勵可兩浙運副制

敕具官某：吳越俗阜事繁，朕思得良使者，往率列城，究宣恩施。惟爾比膺臨遣，將漕淮壩，刺舉之能，見於已試，易茲劇部，朕所選掄。尚其懋承，毋或怠忽，以稱朕命。可。《摘文堂集》卷四。

淮南江浙發運使劉何可集賢殿修撰差遣依舊制

文見官吏拜罷·館閣與殿閣

朝散郎河東經略司管勾機宜文字李成允可陝西

轉運判官制

敕具官某：諸部要劇，莫如陝郊，將漕之臣，臨遣尤慎。惟爾嘗從戎幕，詳練事爲，寵以使軺，宜克稱職。往加勵勉，尚觀爾能。可。《摘文堂集》卷五。

宣德郎新除大理寺主簿王萬可京畿轉運判官填

創置闕制

敕具官某：京輔轉輸，視他路爲劇，比降詔旨，增遣使軺，俾貳厥事。而以推擇，預茲新命，豈不榮哉！往悉乃心，務底功實，千里非遠，民言日聞，朕得以考焉。可。《摘文堂集》卷五。

新湖北路轉運判官劉損可江東路轉運判官相度

湖南北路采木初變可湖北路轉運判官制

敕具官某等：朕以良法美意，加惠四方，推行未淹，已著成效。部使者惟克遵奉，察吏之虔，時乃稱職。汝材力有餘，久更事任，選於在列，往佐外臺。汝其思朕所以臨遣之意，毋以便文僥倖，朕將觀汝之能而以寵榮加焉，汝其勉哉。可。《摘文堂集》卷五。

戶部員外郎周紳可淮南轉運判官制

敕具官某：朕緝熙法度，布之四方，部使者惟達於朝廷恩意志慮，乃克稱職。爾比以材選，爲郎劇曹，長淮之南，往分使指。爾其遵奉詔令，察吏之不虔，俾惠澤下究，以副朕命，尚其勉哉。可。《摘文堂集》卷五。

崇儀使何灌可就差提舉河東路保甲兼提點刑獄

制

敕具官某：爾進由武列，材美可嘉，賜對燕朝，敷納有序。河東要部，擢領使華，按予民兵，兼糾庶獄，資其宣力，事任匪輕。往懋乃功，以稱推擇。可。《摘文堂集》卷五。

朝請郎同管勾成都府等路茶事兼提舉陝西等路
買馬公事龐寅孫可依前官除直秘閣差遣依舊
制

敕具官某：爾以材力之優，往按茶事，收息饒羨，勞列可嘉。薈閣寵名，選授惟慎，增華使指，惟爾之榮。往其欽承，益圖效實。可。《摘文堂集》卷五。

從事郎充熙河蘭湟路轉運司勾當公事程固可改

合入官差遣如故制^(一)

敕具官某：士由銓調以升京秩者，朕必引之陛見，親閱其人。爾今居職而朕就命之，爾之膺此，可謂榮矣。其究乃心，以圖報稱。可。《摘文堂集》卷六。

直龍圖閣權發遣河北路都轉運使梁子美可特落

發遣字制

敕具官某：朔部被邊帶河^(二)，國之根本，總司漕輓，委用不輕。爾才力有餘，濟以勤恪，宣勞外服，所至可稱。比繇簡知，專往使事，率職愈厲，朕豈弭忘！用加褒升，寵以資任。祇服恩命，尚其懋哉。可。《摘文堂集》卷六。

京畿轉運副使張杲可升充轉運使仍遷一官制

敕具官某：置使京畿，總司漕輓，職專刺舉，權任匪輕。

爾膺選掄，擢貳厥事，與建比輔，勞力克彰。宜正使名，乃遷秩序。茲爲褒寵，無忘欽承。可。《摘文堂集》卷六。

河北路轉運副使侯臨移陝西路制

自陝以西，列城數十，轉輸之計，允藉通才。爾燕朝賜對，占奏可嘉，輟自朔方，總按關右，均通食貨，豐衍邦儲，考覈吏能，修舉衆職，時汝之任，往惟欽哉。《劉給諫集》卷二。

中大夫直龍圖閣董正封爲集英殿修撰兩浙轉運

使制

朕分道置使，以任轉輸，又俾之察視郡縣，以寄朕之耳目，其選可不重哉。爾長於吏治，事任薦更，銜恤去官，亦既終制，宜頒明命，將漕全吳，用升書殿之華，以增使權之重，其無剝下媚上，縱吏蠹民，則稱朕意。《劉給諫集》卷二。

承議郎提舉京畿學事葉源改兩浙學事制

朕分遣詔使，典司學事，選用之慎，必惟其人。爾元豐名儒，趨操純正，屢將使旨，蔚有休稱。宜自京畿，往臨浙部。爾其勸獎士類，布宣詔條，使成材衆多，上副樂育，則予以懌，汝亦有辭。《劉給諫集》卷二。

(一) 勾當：原作「太上御上當」，據四庫本改。
(二) 帶河：原作「一帶」，據四庫本改。

都水使者吳价爲徽猷閣待制河北路都轉運使制^(一)

治財猶治水也，行其所無事而已矣。爾典水政，厥有俊功，朔方飛輓，命爾總之。超升次對之聯，以寵皇華之使。爾其洞究源流，儲衍兵食，國裕而民亦裕，田里絕滯冤之歎者，是豈非以治水之道治財乎？《劉給諫集》卷二。

朝請郎祠部員外郎石景術提點京西北路刑獄宣

德郎提點京畿刑獄張閱爲河北路轉運副使制

朕惟神考，以民社之司寄責之守令，以守令之臧否責之部使者。一時得人，熙、豐號爲盛治。肆朕紹述，尤慎選掄。以爾景術，吏治詳敏，故擢以河朔轉輸之寄。各揚乃職，督視一道，上無蠹民之吏，下無冤枉之民，庶幾同符熙、豐，以彰朕用人之明。《劉給諫集》卷二。

勾仲甫除荆湖北路提點刑獄制

荆湖之北，控制諸蠻，物夥事繁，獄市易擾，肆求望實，往按詳刑。爾曩以才揚，嘗歷方面，罷斥滋久，能務省循，朕不汝棄，就畀使軺，益圖厥修，副予欽恤。《劉給諫集》卷二。

許天啓胡簡修專切提舉河東陝西鑄錢詔

政和元年三月十一日

陝西、河東興復鼓鑄夾錫錢寶，雖令逐路轉運司管勾，緣漕

司職事繁冗，方鼓鑄之初，頗有措置，恐難以兼領，別致稽緩。其陝西、河東路可各差文臣一員充，專切提舉鑄錢。中大夫、提舉亳州明道宮許天啓專切提舉河東路鑄錢，朝散大夫胡簡修專切提舉陝西路鑄錢，所貴事法專一，早見就緒。《宋會要輯稿》職官四三之一二五。

兩浙路提刑周邦式江東路提刑李公年兩易制

政和三年四月七日^(二)

江左之地瘠，其民力耕而望歲；吳越之地富庶，其民趨末而彌侈。夫禮義生於富足，疑若易治。然瘠土之民，勞則好義，其富有不如貧之紓也。唯視其俗之緩急，以爲賦政之寬猛，於是乎嚴而不疵，寬而不流。汝等既將命矣，易地而往，勉服此言。《忠惠集》卷二。

黃靜廣東路常平盧知原利州路常平制

先帝爲力本任農之法，而尤詳於荒政，豐則委積，水旱則施舍，所以權節民用而爲取與，其法完矣。然視歲之上下，察民之緩急，非才識之士，通達法令，審於奉承，則吾不以付之。爾等咸以選用，祇服此言。《忠惠集》卷二。

(一) 吳价：疑當作「吳玠」，然非《宋史·吳玠傳》中之吳玠。
(二) 年月日據《會稽續志》卷二補。

湖南常平王本除京畿路提舉常平鄧益京西路提

舉常平制

朕推哀矜恤隱之德，昇於將命喻指之臣，使推斯意，以致斯事，夫能體朕德意鮮矣。昔成王之告康叔，未有若汝封之心，朕心朕德惟乃知。以成王咨嗟勤懇如是，夫能喻上所欲，推以置人腹心，難矣哉。爾等咸朕識擢，無忘訓飭。《忠惠集》卷二。

又朝請郎黃靜福建常平制

汝出於閩粵，俾汝將事，徒以汝能識民情偽，知吏寬猛。夫以王命督察郡國，固已榮矣，而況懷綬以歸郡邸，持節以見關吏，豈非昔人所賢，而於汝謂寵乎！《忠惠集》卷二。

應安道除淮東路常平制

朕建勸農之官，修水土之政，爲復除以惠鰥寡，均地賦以寬民力。有不順成，荒政畢舉，靡所遺矣。汝以才選，奉若成憲，則爲稱職。《忠惠集》卷二。

武功大夫宋滋提舉京畿路保甲兼提刑制

三代兵刑爲一，所謂大刑兵也。今汝以武列用，夫能教民技藝拳勇，汝之所易，而用律察於微文，汝之所難也。然吏道以法令爲師，輕重有典，而師衆以順爲武，必其少長有禮，而後兵可用也，其責不亦難乎？汝慎其所易而深憂其所難，則寡過矣。

《忠惠集》卷二。

賈君文河北路提刑兼保甲制

朕繕修武備，而寓兵於農，矜慎庶獄，而求生於律。夫民勇而知方則易使，獄以情察則民服。兵與刑，國之大事也。汝以武選奉將使指，習於舊治，則易爲政。治兵欲嚴，恤刑欲寬，嚴失於急，寬失於縱，能審而用，則罔所愆。可。《忠惠集》卷二。

宋滋賈君文康厚种師中王環滿志行並提點刑獄

兼保甲制

國之兵刑，大事所在。朕惟無有驟用其民，不教而戰；又惟無有誤於庶獄，不辜於戮。故講事於蒐狩，教民知義，哀矜於刑罰，以良折獄。其孰能奉將使指，俾予從欲以治者乎！汝以武選，祇服朕訓，惟慎與畏，庶幾有濟。《忠惠集》卷二。

葉默等江東淮南運副制

惟古王人，存省諸侯，粵行人，擇人暨訓方氏，形方氏典乃職，王又時巡，觀侯度，詔賞罰。朕惟今邦國若否，耳目是寄，實惟爾膚使。汝等舊惟成人，往指告於四方，寬詔地^(一)，惻瘼罰刑，俾遠不咸於朕教，時乃休。《忠惠集》卷二。

荆湖北路提刑徐宅除荆湖南路運副制

昔孔子稱季路果於從政，可使治賦於千乘之國。夫千乘，諸

(一) 此句似有脫誤。

侯之封也，顧子路兼人者能之，今刺史總郡國如古者十數，而責成於一人之任，豈不難哉？然能使雖衆如寡，雖遠如近，惟才者然後優爲也。汝使於四方，以善最聞。其服新命，往底成績。

《忠惠集》卷二。

王璠除京西運使制

惟茲官師、百執，委任責成既久，乃孚咸即爾工。矧歷試，惟舊，有勞於厥邦，用嘉厥休無斁。爾宣力四方，正事克明，乃良於行，丕應朕志，茲予商賚爾功，懋正顯秩。維民綏於舊訓，維政事習於舊俗，上下胥信，時則罔艱。其爾慎愆厥終，往承於故武。《忠惠集》卷二。

直龍圖閣梓州路運副趙通除集賢殿修撰本路運

使制

昔先王勉勵在服，制爲德賞，無敢以其作好輕用。唯是車服之寵，曰天命有德，將實代天鑑觀而與之，可輕乎哉！朕躬率是道，以視群臣。汝將事於蜀，顯有不績。秘殿之職，華國之選，朕非以是私汝，亦非以是徒寵汝爲也。其思所以畀汝者。《忠惠集》卷二。

陳覺民起復陝西運使制

汝執親之喪，篤於守禮。朕惟忠臣殉國之義，有釋哀奪情之典，起汝哀疚，付之漕事。夫禮有適變而從宜，權有反經而合道，汝學於古，則嘗聞之矣。祇服朕命，以顯乃親。《忠惠集》

卷二。

江東路轉運副使姚孳荆湖北路轉運副使孫漸兩

易制

古者荊州之域，其川九江，其賦上下，其在春秋楚之建國也。後世始分江湖，以殊統制。今爾漸以嫌自列，朕惟忠臣事君，無有擇地而處，又以禮必均勞逸，不求於他，使與孳易。皆禹服荊州之地，職貢既同，厥壤惟舊。所以爲爾等自謀深矣。其祇悉朕意，務安爾職。《忠惠集》卷二。

淮南路轉運副使宋康年淮南江浙荆湖制置發運

副使制

惟東南貢賦，漕舟自淮泗，歲不時入，用蠹厥載。朕俾厥貢，自庶邦徑底於中畿，餉溢予廩，時乃食新。爾以推擇承命，奉若成憲。朕方盍徵以裕民，乃其取贏爲羨餘，朕弗臧乃事，時則有愆。惟爾迪知畏義，其往省哉。《忠惠集》卷二。

徽猷閣待制張果除真定府路安撫使兼知成德軍

制

河朔，天下之根本，昔者禹於冀州，獨重其賦，而常山兵賦之重，爲河朔根本之固。維此真定，密邇獯鬻，謀用儒帥，折衝未形。具官某使於四方，宣力惟舊，忠以上事，義不辭難。方朝廷柔以大盟，而疆場安於無事，繫爾更歷，往予綏靖。治兵牧

民，文武並用，其訖爾庸，以寬予顧。《忠惠集》卷二。

王璟河北路沿邊安撫副使劉宗道京畿路提刑兼保甲制

訓兵於畿甸，備邊於河朔，授以使指，傳之戎政，皆武列之選也。汝自外而入，其責益專，審慎刑辟，肅齊師旅，祇服朕訓，以底成績。《忠惠集》卷二。

徽猷閣待制知永興軍何述除涇原路經略安撫使

知渭州制

四方無虞，兵寢不試，則疆場之臣，參用儒者，使備患於無事，而厭難於未形。顧非邇臣，孰堪倚重？具官某以儒術進用，以吏事通顯，撫臨西秦，具著威信。易爾節制，往釐平涼。夫上兵伐謀，無所事戰，軍事有禮，無易紀律。朕方懷柔四國，不勤遠略。爾其謹修兵戎，有備無患。《忠惠集》卷二。

宋代詔令全集卷三二九

官吏拜罷

路官 四

吳亮專一應副熙河糧草詔

政和五年三月十五日

熙河重地，當罷兵無事之際，尚爾闕乏，緩急何以枝梧？漕臣不可暫闕。仰吳亮專一應副本路，限指揮到日下，起發兼程前去，多方剗刷糴本，措畫糴買。趙佺已起發錢鈔一百五十八萬貫，仰吳亮交割督促，措畫施行，具次第應付過斛斗糴本數奏。

《宋會要輯稿》食貨四〇之五。

除李昌孺都大提舉茶馬制

在昔元豐，留神武備。摘山市駿，具著科條。乃詔攸司，悉遵成憲，乃將使旨，實克推行。《翰苑新書》前集卷四九。

除徐謹都大坑冶制

朕修山澤之政令，以足國裕民。天方降休，地不愛寶。惟是興利之廣，幅帙既長，必資能臣，以持九路之節。《古今事文類聚》遺集卷一三。

酬獎鄭昌朝等詔

政和八年六月二十六日 文見官吏拜

罷·軍事統率機構與地方治安機構官

陳隆壽專一管勾鑑湖田事詔

宣和二年十二月三日

新提舉兩浙常平陳隆壽且令依舊在鹽香本任，依已得指揮專一管勾鑑湖田事，不簽書鹽香職事。《宋會要輯稿》職官四三之一〇。

成都府路提舉常平王琮再任詔

宣和五年二月二十

六日

成都路提舉常平王琮自到任，首治贓吏。陳令胙、范霑、王恪贓狀敗露，本路諸司多所干涉，琮獨能自潔。候今任滿日，特令再任。《宋會要輯稿》職官六〇之二五。

趙岍唐績再任詔

宣和七年十一月二十二日

奉直大夫權發遣福建路轉運副使趙岍、朝請大夫福建路轉運判官唐績措置造茶有方，並特令再任。《宋會要輯稿》職官六〇之二七。

陳邁中山路安撫使制

敕：師克在和，方慎鎮綏之寄；人惟求舊，益隆注倚之私。乃眷老成，申頒優渥。具官某早以風幹，寢被簡知。敦邵穀之詩書，浚分閫奇；師留侯之智勇，灼著戰功。屹若長城，護我方面。屬茲易地，還蒞舊封。拊循兵民，謹守疆圉。緊爾中山之重，寬予北顧之憂。可。《橫塘集》卷七。

郭琰陝西轉運副使兼制置解鹽使制

敕具官某：解池滋息，實佐邊費。廼者任非其人，公私告

病。肆求能吏，俾經理之。爾琰早以風幹，屢更使指，蔚有望實，稱於搢紳。其以冊府論撰之職，往副關陝漕輓之事，凡鹽澤之盈虛，貿易之政令，惟爾精講而力行之。使商賈流通，邦計給足。時乃之職，可不勉哉。可。《橫塘集》卷七。

李邕依舊真定安撫使制

靖康元年七月二十九日〔一〕

敕：自金人侵侮〔二〕，河朔用兵，多士獻言，莫先擇帥。朕

惟用人在乎因任，泛舉不如求舊，於以底績，不亦優乎？具官某以孝爲忠，寓文於武，出守關塞，持節西河，威名灼著，邊人信服。比膺東求，分闔全趙。易鎮定武，乃以親名自列，避而弗居。是用申命，俾仍舊服。維我祖宗善馭將，而漢班超則善守邊。撫育將士，綏靖疆場〔三〕，使敵人畏威而遠遁。惟爾勉之，益勵乃績。可。《橫塘集》卷七。

黃敦書京畿提刑制

輦轂之下，惠澤宜先，而五方豪傑之林，儒俠雜居，犯法者衆。必有部刺史戢姦禁暴，以謹無良，庶幾千里之畿，靡有一夫之獄。爾以治行聞於朝廷，几案之才綽有餘力，必能深識朕意，綏靖一方，察其廉貪，以詔賞罰。尚有褒典，以俟爾庸。《鴻慶居士文集》卷二五。

武功大夫安州團練使徐衡提舉京畿保甲兼提點

刑獄武功大夫榮州團練使康隨提舉河東路保

甲兼提點刑獄制

朕嗣位以來，閔仁元元，去薄從忠，施舍已責。而闕門之外，海隅之遠，猶有不得其平者，吏擾之也。以爾衡器資彊毅，可以濟煩，以爾隨吏道疏通，可以從政。各服乃事，不侮鰥寡，無擾獄市，稱朕意焉。《鴻慶居士文集》卷二五。

張深除龍圖閣直學士京兆府路安撫使制

建炎元

年五月三日壬辰〔四〕

秦地被山帶河，持戟百萬，陸海之富，甲於四方。炎正中微，小雅盡廢，國步日蹙，強虜扇行。申畫郊圻，責在將帥。具官某剛毅之氣足以任重，忠信之行足以鎮浮，歷事三朝，夷險一節，中外邊瑣，首忤貴臣。風績凜然，老而彌篤。進升內閣，鎮撫大邦，爲朕長城，折衝千里。佇聞報政，嗣有寵章。《鴻慶居士文集》卷二六。

〔一〕年月日據《三朝北盟會編》卷五〇補。

〔二〕侵侮：翰林院本作「犯順」，永嘉本作「內擾」。

〔三〕場：似當作「場」。

〔四〕年月日據《建炎以來繫年要錄》卷五補。

王庶除直龍圖閣權發遣鄜延路經略安撫使制

建炎元年五月三日壬辰〔一〕

具官某：山西古秦俗也，扼虎命世之才，裂眚決胸之勇〔二〕，常雄視天下。屬時承平，氣節衰矣，而故家遺俗，猶足以震羌戎於萬里之外。以爾忠信之行，事上不欺，剛健之才，臨機克斷，踐更庶事，風績藹然。進直河圖，往治西土，追還故俗，著之風聲。使齊人歸我侵疆，汝亦與有亡窮之聞。《鴻慶居士文集》卷二六。

李祐除京東轉運副使制〔三〕

具官某：青齊之國，沃野千里，桑麻之富，衣被天下。干戈未靖，飢疫相熏，申飭使軺，布宣德意。勿謂海隅之遠，在予庭戶之間。以爾慈惠有循吏之遺風，議論得世臣之餘烈，荐更任使，強敏有聞。載疇爾勞，奉使一道。助朕初政，益修厥官，達於斂散之權，不失綏懷之體。上下與足，時乃之休。《鴻慶居士文集》卷二六。

趙哲提舉兩浙路巡社兼提點刑獄公事制

建炎元年

年十月二十四日庚辰〔四〕

古者鄉立塢壁，防盜賊之侵己，室家可保。今吾廣其法於天下，又置使者推行之，庶幾姦宄潛消，里閭無事。以爾屢更煩使，蔚有能稱，茲用假爾繡衣之榮，往臨吳會。汝其徧詣提封，申明約束，毋彊不欲，毋縱敗群。使農安於野，行旅通於塗，則爲稱職。《浮溪集》卷八。

都官員外郎尹忠臣廣南東路轉運判官制

建炎元年

年十二月二十五日庚辰〔五〕

朕惟嶺海去京師萬里之遠，民弱而陋，吏貪而愚，法令詔條，所存無幾，非廉平強濟者，孰能稱吾臨遣之意哉？以爾風力有聞，吏功屢最，宜從省戶之選，往疾使軺之驅。爾其謹視官邪，拊循蠻俗，使斯民受賜，如在朕戶庭之間，則汝爲稱職。《浮溪集》卷八。

黃敦彥除京畿轉運判官制〔六〕

具官某：闕門之外〔七〕，惠澤所先。疆寇內侵，赤地千里，人罹塗炭，禍及雞豚。乃飭乘軺賦命之臣，體予哀矜元元之意。爾由推擇，奉使邦畿，尚有遺民，往喻朕意。如烹鮮勿擾，如制錦勿傷，手摩拊之，裕其衣食。宜體任官之意，勿懷擇事之心。益勵厥修，美成在久。《鴻慶居士文集》卷二六。

- 〔一〕 年月日據《建炎以來繫年要錄》卷五補。
- 〔二〕 胸：原闕，據《全集》卷二七、四庫本、明抄本補。
- 〔三〕 祐：《全集》卷二七、四庫本作「祐」。
- 〔四〕 年月日據《建炎以來繫年要錄》卷一〇補。
- 〔五〕 年月日據《建炎以來繫年要錄》卷一二建炎二年正月丙戌條注補。
- 〔六〕 黃敦彥：原作「黃彥」，據明抄本改。按《建炎以來繫年要錄》無載「黃彥」者，熙寧六年中進士之黃彥，卒於四年。又李綱《建炎時政記》載建炎元年七月黃敦彥除河北西路轉運判官，當即此人。
- 〔七〕 闕：原作「關」，據《全集》卷二七、四庫本改。

凌唐佐直秘閣京畿提刑再任制

朕省方南服空，京師不都，然宗廟宮室在焉。既命重臣以守，又擇部使者歲時按行其封。以爾詳練有聞，不辭繁劇，平反畿內，民以不冤。其升延閣之班，重付祥刑之寄。尚巡凋瘵，毋廢哀矜。《浮溪集》卷八。

陳起宗直徽猷閣都大提舉川陝路茶馬制

朕惟馬政不修，無甚今日，軍容廢缺，朕甚憂之。以爾少有俊才，累更幕府，必能爲吾講摘山之利，得充廐之良，協和種羌，貿易無壅。是用進凝嚴之直，爲臨遣之榮。昔衛文公承國遷之後，元年車三十乘，末乃十之。豈區區諸侯之國，而今不及古哉？在爾勉之而已。《浮溪集》卷八。

呂士昭提舉保甲兼河東提刑制

朕惟河東之民，當敵騎之人，一方凋瘵，士氣索然，思有以作新振起之。以爾擢自稠人，屢更繁使，必能爲吾得被堅執銳之士，揚鉤深致遠之威。雖列職外臺，未殫所蘊，政成來報，朕不汝忘。《浮溪集》卷八。

范冲荆湖北路轉運副使制

建炎二年正月十八日癸卯

卯

嗚呼！自艱難以來，民勞甚矣。欲惠吾元元無侵冤之苦者，非部使者孰任其責哉？以爾論議英明，世其家學，踐揚中外，

所至可觀。惟湖湘控帶東南，地數千里，盜新喋血，耕稼失時。汝其謹視官邪，應條輒舉，使一方之俗，皆蒙朝廷之恩，副朕臨遣之意，則汝之譽處，豈不休哉？《浮溪集》卷八。

京東路轉運判官柴天因升轉運副使兼知青州制

建炎二年二月乙卯朔日

海岱之間，稱古形勝，人比習亂，莽爲盜區。思得詳練剛明之材，兼膺折衝饋餉之任。以爾知吏方略，爲時老成，久分外計之權，頗熟東州之事。其升使選，勉爲朕行。昔管仲佐齊侯，內修軍政，龔遂至渤海，首散郡兵。伊治術之何常，惟賢明之所擇。審思籌策，毋失事機。《浮溪集》卷八。

成大亨直秘閣兩浙轉運使制

敕具官：外臺轉漕之權，浙部富實之境。衣冠避地，流寓爲多；警蹕省方，仰給者衆。孰膺遴選，宜得能臣。爾早涉藝文，尤通吏治。久服勞於州縣，既擢位於郎曹。譽處彌休，安恬自得。俾直圖書之府，往臨吳越之區。非威望不足以厭服姦萌，非清裁不足以表率群吏。貢賦無追科之擾，關梁有捍禦之方。往體訓言，是爲稱職。可。《大隱集》卷三。

- (一) 年月日據《建炎以來繫年要錄》卷一三補。
(二) 年月日據《建炎以來繫年要錄》卷一三補。

蘇恪廣東轉運使制

敕：朕惟五嶺之南，去朝廷遠甚，官多假版，吏緣爲姦。思得忠信之臣，往將使指。爾材猷明敏，列職郎曹。服采惟勤，聞譽休顯，持節南粵，宜爲朕行。使民情上聞，惠澤下究。斯爲稱職，尚勉之哉！可。《大隱集》卷三。

張自牧轉兩官直秘閣京東轉運判官制

朕惟東州經喋血之餘，兵民雜屯，農末皆病，思得奇士，通吾利源。以爾膺特起之招，有非常之略，頃將使指，信著此方。其升延閣之班，仍峻文階之等。往乘軺傳，臨按列城。如飛輓之稍行，則瘡痍之可復。政成來報，朕不汝忘。《浮溪集》卷八。

武功大夫忠州刺史淮南西路提刑馬識遠可除右

武大夫知壽春府兼淮南西路安撫使制

文見官

吏拜罷·州府軍監官

端明殿學士朝奉大夫同簽書樞密院事周望可除

兩浙宣撫使制

建炎三年九月八日癸丑〔一〕

敕：自南渡以來，亂靡有定，敵不去境，人情未安。思得

魁壘之臣，付以折衝之寄，盡護諸將，鎮茲要津。我求其人，得於近輔。具官某深沈而精敏，敦大而高明。行義足以厲風俗之

媿，忠誠足以荷邦家之重。居無擇事，任不辭難。北使強鄰，銜

命冒兵交之險；南平逋寇，出師行天討之誅。載疇勳庸，延置宥密。摠發經綸之蘊，備聞帷幄之謀。朕方移蹕南巡，留屯近戍，其即樞機之任，往宣鈇鉞之威。維患必豫防，正循江而嚴備；顧兵難預度，煩總衆以親臨。佇聞綏靖之期，還倚贊襄之助。體予注意，勉爾成功。可。《北海集》卷四。

朝散大夫秘閣修撰知衢州胡唐老可除徽猷閣待

制知鎮江府充浙西路安撫使制

建炎三年九月二

十四日己巳〔二〕

文見官吏拜罷·州府軍監官

宋輝直龍圖閣發運副使制

建炎三年十二月十四日

戊子〔三〕

敕：朕惟江淮六路，財賦之淵藪，而發運使副，實總治之。自外敵馮陵，移駐江左。仰給調度，視平日爲多；而懋遷有無，於一時爲急。欲任厥事，可不惟其人哉？爾材力強敏，心計精明。事不辭難，所臨必最。舳艫應募，則千艘畢集；轉輸浮海，則萬斛安濟。已試之效，卓然可觀。是用命爾，進直河圖，以總東南之漕計。爾其究心乃事，濟時多艱。益著爾勞，思稱朕命。可。《大隱集》卷三。

〔一〕年月日據《建炎以來繫年要錄》卷二八補。

〔二〕年月日據《建炎以來繫年要錄》卷二八補。又「秘閣修撰」前，乾隆

翰林院抄本多一「充」字。

〔三〕年月日據《建炎以來繫年要錄》卷三〇補。

知徐州趙立治郡忠勞顯著可特轉武德大夫兼閭

門宣贊舍人充管内安撫使制

敕具官某：彭門當淮楚要衝之會，承兵火傷殘之餘，井邑丘墟，閭閻埃燼。爾能收合離散，保守城隍，經畫有方，忠勞顯著。載嘉乃績，褒進厥官，兼頒贊之榮名，領撫綏之重寄。益殫爾力，以稱朕恩。可。《北海集》卷三。

王敏文潼川府路轉運副使制

嗚呼！自艱難以來，民勞甚矣。惟兩川獨爲全，實譬善醫者護其良膚，則其他瘡痍所生，不勞而復。其於命使，可不選掄？以爾操行廉平，所臨輒治，是用付爾以潼江之節。爾其調節邦用如血脉然，使一方阜安，則中原蒙福。能任茲責，時乃之休。《浮溪集》卷八。

褚宗諤廣南東路轉運副使制

朕惟嶺海萬里之遠，雖飛輓沫粟，不至中州，而象犀珠貝之珍，實佐經費。以爾吏能高妙，所至有聲，深達利源，精於心計。其上江壩之節，往臨蠻蜚之區。報政來歸，參華奚遠？《浮溪集》卷八。

李承造兩浙轉運使制

敕：朕惟吳越之壤，民物阜康。惟茲戎輅巡幸之時，尤重外臺轉漕之寄。爾才資明敏，智略周通。比由宰士之聯，往蒞名

城之守。以下原本缺。《大隱集》卷三。

姜仲謙起復湖北轉運使制

敕：人子執親之喪，三年不從政，然金革之事無避也。朕屬時艱難，思與四方之士共圖康功，可不變禮以從宜哉？爾風力強明，材猷敏濟。荐更使指，咸以能聞。比以苴衰，乃辭王事。朕惟荆湖之沃壤，實連江海之上游，控扼輪將，於今爲重。宜起倚廬之戚，往持漕運之權。其既乃心，亟圖厥事。可。《大隱集》卷三。

上官愔除直秘閣京畿運副使制

敕具官：昔榮夷公好專利，而王悅之。芮良夫知王室之將卑，以爲王人者，導利而布之上下者也，而或專之，其害多矣。朕念掌財計之臣，務以聚斂趣辦，或者取羨餘以市恩，其能捐橫斂，恤民隱，爲朝廷布仁義之澤者幾希。爾將漕王畿，論事有體。乃能奉朕寬恤元元之意，丐罷苛擾刻剝之令於用度殫屈之時，朕甚嘉之。其升延閣之班，仍正使名之重，將以風厲四方，使刻削之風丕變，而吾凋瘵之民，庶乎少休息矣。清資顯秩，於爾何愛焉。可。《大隱集》卷三。

(二) 使：原脫，據乾隆翰林院抄本補。